

UNE “PATRIE” DI DUT IL FRIÛL

Cjar Diretôr,

insieme cul abonament, j mandi cuatri riis di augûrs e, se mi permet, une prejere: no steit a fâ de “Patrie” il gjornâl dai cjargnei, ma di ducju i furlans dal Friûl storic. E fevelait de Basse, fevelait di chiste tiare cussì imbastardide par colpe di tancju aministradôrs e pulitics ancje furlans traditôrs. Vi siguri che la puare int come me e à simpri vive la speranse di viodi dut il Friûl storic sot di un’uniche bandiere come ch’a ere une volte. Almanco tal miô paîs i zovins (robe di 16-20 ains) fevelin ducju furlan (ancje se i lôr gjenitôrs di piçui ai vevin insegnât dome talian). La zoventût dal miô paîs e dà buinis speransis pal avignî de Patrie.

Ma ch’a mi crodi, i furlans plui di amirâ a son chêi de province di Vignesie: San Micjêl, Portogruarês... And’è, pûs, a è vere, ma a son comovens pal atacament al Friûl. La magjoranse, magari cussì no, si è lassade imbastardî e forsit no si podarà plui fâle rinsavî.

Dedichèi un bon articul a chiscju eroics di furlans ch’a son ancjemò sot il colonialisim venit; incoragièiu, premièiu. A meretin veramenti.

Lu lassi cu la speranse di viodi une dì Realtât chel che vuè a no son âtri che nobilis e legjtimis aspirazions: un Friûl unît, libar e furlan.

Mario M. - La Tisane

Nol è che la “Patrie” e seti il gjornâl dai cjargnei. L’implant di fonde al riguarde dut il Friûl. Al è un fat che, soledut pal teritori, si dâj plui atenzion ae Mont. Lis resons a son amancul dôs. La prime e jè che si trate di une tiere cun mil problemis e che i furlans dapît des monz a cjalin ai furlans di venti-sù come a int che vîf in... Gjermanie. Al è just fevelâ di plui di chêi che àn plui dibisugne di dâur vôs. La seconde e jè pratiche. In Cjargne o vin brave int che ogni mès nus dan un scandai de lôr Realtât. Mi permet di fâ doi nons: Sef Cjargnel e Renzo Balzan.

Il gjornâl al va indevant cu la buine volontât e la colaborazion di duc’ e duc’ a puedin dâ une man par slargjâlu tant a nivel di difusion che di contignût. Se lui, par esenpli, nus jude a fâ cognossi lis gloriis e lis passions de Basse e dai amîs di là dal Tiliment ma no di là dal cûr, nus fâs un ben a nô e a lôr.

O soi contenton di sintî che and’è ancjemò int che no si è lassade imbastardî e che si bat par un Friûl vîf e unît. Lis grandis vueris no lis vincin chêi ch’a fasin plui sunsûr ma chêi che, cence stufâsi, a tegin vive la flame dal amôr pe lôr tiere. Non sarà mai tanc’ ma nancje no restarìn mai cence. E di lì al partis dut.

Març 1985

Antoni Beline